

Siunnersuummut oqaaseqaatit

Oqaaseqaatit nalinginnaasut

1. Aallaqqaasiut

Siunnersuutikkut 2024-mut aningaasanut inatsisip akuersissutigineqarnissaanut killiliussaq ullormut 25. november 2023-mut sivitsorneqarpoq. Tamatumalu kingunerisaanik nuna tamakkerlugu akileraarummut aamma nuna tamakkerlugu immikkut ittumik akileraarummut procentiliussamik aalajangersaanissamut killiliussat sivitsorneqarput, siunnersuummi immikkoortut pingaarnert aalajangersakkanullu ataasiakkaanut nassuiaatit takuuk.

2. Siunnersuutip imarisai pingaarnert

Inatsisartut Naalakkersuisullu pillugit Inatsisartut inatsisaat nr. 26, 18. november 2010-meersumi § 15-imi ukioq aningaasanut inatsiseqarfiusoq sioqqullugu kingusinnerpaamik novembarip ulluisa 15-ianni Aningaasanut Inatsit akuersissutigineqartassasoq allassimavoq.

Aningaasanut inatsisissatut siunnersuutip isumaqatiginninniutigineqarnissaanut piffissaqarnerunissaq pisariaqartinneqarpoq. Taamaattumik Aningaasaqarnermut Akileraartarnermullu Ataatsimiititaliaq Naalakkersuisut 2024-mut aningaasanut inatsisip akuerineqarnissaanut killigititap kinguartinneqarnissaa pillugu siunnersuummik saqqummiussissasut isumaqatigineqarpoq.

Tamatumali nassatarisaanik piffissaliussat allat aamma sivitsorneqartariaqarput:

Aningaasarsianit akileraarutit pillugit Inatsisartut inatsisaanni § 61, imm. 2-mi aamma § 64, imm. 2-mi aalajangersarneqarpoq, nuna tamakkerlugu akileraarutit aamma nuna tamakkerlugu immikkut akileraarutit procentii qaammatsiutit malillugit ukioq pineqartoq sioqqullugu 15. november nallertinnagu Inatsisartunit aalajangerneqartassasut. Procentit akileraarusiissutit aningaasanut inatsisip ilaatut annertussusilerneqartarput. Taamaammat siunnersuutaavoq ukioq manna piffissaliussaq, aningaasanut inatsisissap akuersissutigineqarnissaanut piffissaliussaq assigalugu 24. novemberimut sivitsorneqassasoq.

Kommunalbestyrelsit ukiunut aggersunut missingersuutinik akuersinissaannut kommunimullu akileraarutit aalajangersaanissaanut killigititap siunnersuummit kalluarneqanngillat. Tamatumunnga pissutaavoq ulloq 1. decembarip tamatumunnga killigititaanera.

3. Pisortanut aningaasatigut allaffissornikkullu sunniutissai

Siunnersuutip pisortanut sunniuteqangaarnissaa naatsorsuutigineqanngilaq.

4. Inuussutissarsiutinik ingerlataqartunut il. il. aningaasatigut allaffissornikkullu sunniutissai

Siunnersuut inuussutissarsiutinik ingerlataqartunut aningaasatigut sunniuteqanngilaq.

5. Avatangiisinut pinngortitamullu sunniutissai

Siunnersuut avatangiisinut pinngortitamullu sunniuteqanngilaq.

6. Innuttaasunut allaffissornikkut sunniutissai

Siunnersuut innuttaasunut allaffissornikkut sunniuteqanngilaq.

7. Naalagaaffeqatigiinnermut Namminersorlutillu Oqartussanut tunngasut

Siunnersuut Naalagaaffeqatigiinnermut Kalaallilluunniit Nunaata tunngaviusumik inatsisitigut inissisimaneranut sunniuteqanngilaq.

8. Oqartussaasunik kattuffinnillu tusarniaaneq

Siunnersuut piffissakilliorneq pissutigalugu tusarniaassutigineqanngilaq. Siunnersuut Namminersorlutik Oqartussani naalakkersuisoqarfiit attuumassuteqartut isumasiorlugit suliarineqarpoq, soorluttaaq kommunit tamatuminnga ilisimatinneqareersut.

Siunnersuummi aalajangersakkanut ataasiakkaanut oqaaseqaatit

§ 1-imut

Imm. 1-imut.

Inatsisartut 2024-mut aningaasanut inatsisaata qaammatisiutit malillugit ukioq akileraarfusoq sioqqullugu kingusinnerpaamik 24. november akuersissutigineqarnissaa siunnersuutigineqarpoq. Taamaaliornikkut Inatsisartut Naalakkersuisullu pillugit Inatsisartut inatsisaanni § 15, imm. 1-imi piffissaliusaaq atuuttoq (15. november) avaqqunneqassaaq.

Imm. 2-mut

2024-mut nuna tamakkerlugu akileraarutip qaammatisiutit malillugit ukioq akileraarfusoq sioqqullugu kingusinnerpaamik 24. november akuersissutigineqarnissaa

siunnersuutigineqarpoq. Taamaaliornikkut Aningaasarsianit akileraarutit pillugit Inatsisartut inatsisaanni § 61-imi piffissaliussat atuuttoq (15. november) avaqqunneqassaaq.

Imm. 3-mut

2024-mut nuna tamakkerlugu immikkut akileraarutit qaammatisiutit malillugit ukioq akileraarfiusoq sioqqullugu kingusinnerpaamik 24. november akuersissutigineqarnissaa siunnersuutigineqarpoq. Taamaaliornikkut Aningaasarsianit akileraarutit pillugit Inatsisartut inatsisaanni § 64 imm. 2-mi piffissaliussat atuuttoq (15. november) avaqqunneqassaaq.

§ 2-mut

Inatsisip tamanut nalunaarutigineqarnerata aqaguani atuutilernissaa, ullorlu 1. januar 2024-mi atorunnaassalluni.